

# Personaliti pilihan

Pelbagai individu dan personaliti mewarnai halaman akhbar ini setiap hari, sepanjang minggu. Setiap personaliti melambangkan kisah berbeza; yang mencerminkan ketabahan, kesungguhan dan kejayaan – semuanya bertujuan menyuntik semangat dan sifat bangga dalam kalangan pembaca. Dalam sajian personaliti yang kami laporkan, BH/BM memilih seorang/sekumpulan yang paling meninggalkan kesan.

## Dari aliran Normal Teknikal, ke ITE dan genggam ijazah NTU



DARI seorang pelajar aliran Normal Teknikal ke ijazah Universiti Teknologi Nanyang (NTU).

Encik Muhammad Ashiq Ali membuktikan sesuatu impian itu boleh tercapai, meskipun ia mengambil masa yang lebih lama, asalkan mereka yang mengejarinya tidak berputus asa dan sanggup bekerja keras.

Setelah selesai sekolah menengah, Encik Ashiq kemudian melanjutkan pengajian ke Institut Pendidikan Teknikal (ITE). Dari pengakuannya sendiri, tidak terlintas di fikirannya bahawa beliau akan dapat memenuhi impian ke menara gading.

Namun, hasil kerja kerasnya, daripada ITE beliau melanjutkan pelajarannya ke politeknik dan sejak itu Encik Ashiq menyedari tiada apa yang dapat menghalangnya daripada mencapai impian – kecuali dirinya sendiri.

Hari ini, beliau adalah antara siswazah tahun 2020 NTU yang menerima ijazah mereka pada majlis konvokesyen tertunda akibat pandemik Covid-19 yang diadakan secara fizikal tahun ini.

Kejayaan Encik Ashiq itu lebih mengagumkan lagi memandangkan beliau terpaksa bekerja selepas tamat pengajian di politeknik kerana rasa bertanggungjawab membantu kewangan keluarganya yang agak tersepit.

Ayahnya seorang pengawal keselamatan dan pencari nafkah tunggal, agak sukar menampung keluarga lima anggotanya.

“Melihat kembali perjalanan saya, jika boleh, saya mahu sebarkan mesej bahawa pelajar Normal Teknikal dan ITE lain pun boleh melakukannya.

“Ibu bapa saya amat gembira kerana saya yang pertama dalam keluarga mendapat ijazah sarjana muda, dan mereka tidak sabar hendak datang ke konvokesyen saya,” ujar Encik Ashiq, seorang lulusan kejuruteraan komputer yang telah pun mendapat pekerjaan sebaik sahaja tamat pengajian tahun lalu, dan kini bekerja sebagai pengurus sofwe bersekutu. ►Foto BM oleh KHALID BABA